

یوہ آکاشوانی جموں ہے عید الرحمن تین خبر سٹو۔

Prez Panchyat Awards

صدر جمہوریہ درویدی مرمو اج نوی دہلی غاؤگیان بھون مانہ قومی پنچایت انعام 2024 تقسیم کریں گی۔ اس سال ان انعامات واسطے بکھ بکھ زمران مانہ 45 پنچایت نامزد کی گئی ہیں۔ ان پنچایاتاں غے اندر زمینی سطح ور سماجی ترقی غا بہترین کم کیا گیا ہیں۔ اس تقریب غے دوران پنچایتی راج غا وزیر اک کتابچہ نانہ وی منظر عام ور انیں گا، جس غے اندر انعام حاصل کرن آلی پنچایاتاں غا کم کاج غو طریقو درج وے گو۔ وزارت نے اک بیان مانہ دسیو ہے جے ان انعامات غے نال دیگر پنچایاتاں ور وی مثبت اثر وے گو۔ اور باقی پنچایت وی دیہی علاقہ غے اندر مجموعی ترقی واسطے بہترین طریقہ کار اپنا ویں گی، اور ملک غی ترقی مانہ وی بہترین کردار ادا کریں گی۔

IIT Jammu SIH

اج پورا ملک غے اندر اسمارٹ انڈیا ہیکتھان غی شروعات ہو چکی ہے۔ جموں خطہ غے اندر آئی ٹی جموں اس تقریب غی میزبانی کر رہیو ہے۔ اور تقریباً 28 ٹیم اس تقریب مانہ حصو لے رہی ہیں۔ آکاشوانی جموں غا نمائندہ نے خبر دتی ہے کہ سمارٹ انڈیا ہیکتھان 2024 غی میزبانی آئی ٹی جموں کر رہیو ہے۔ اور لگاتار 36 گھنٹاں تک چلن آلی اس ہیکتھان تقریب مانہ پورا ملک تیں آیا طالب علم تے ان غا استاد حصو لے رہیا ہیں۔ تا کہ حقیقی دنیا غے اندر درپیش کئی طرح غی مشکلات غو ازالو کیو جا سکے۔

CM Cultural Revival

وزیر اعلیٰ عمر عبداللہ نے جموں کشمیر یوٹی غے اندر تہذیبی بقا تے ثقافت نانہ محفوظ رکھن خاطر اک جامع ثقافتی پالیسی تشکیل دین ور زور پایو ہے۔ جموں سول سیکریٹریٹ مانہ ثقافتی محکمہ نال اک جائزہ میٹنگ غے دوران وزیر اعلیٰ نے متعلقہ محکمہ نانہ ہدایت جاری کی ہیں کہ جموں کشمیر غا عظیم ثقافتی ورثہ غا تحفظ خاطر تمام متعلقین غی رائے لے غے اک جامع تے موثر پالیسی بنائی جائے۔ اس دوران موصوف نے متعلقہ محکمہ غے اندر خالی اسامیاں نانہ وی فوری طور پر کرن غی ہدایت کی تا کہ محکمہ غے اندر کم کاج نانہ بہتر طریقہ نال چلايو جا سکے۔ اس جائزہ میٹنگ غے دوران کئی اہم پروجیکٹاں غی بحالی ور تبادلہ خیال کیو گیو۔ جن مانہ مبارک منڈی، ثقافتی کمپلیکس تے آرکائیو ذخیرا شامل ہیں۔ اس دوران موصوف نانہ دسیو گیو کہ ان آرکائیو ذخیراں غو ڈیجیٹل ریکارڈ جموں غے اندر 100 فیصد مکمل کر لیو گیو ہے، جد کہ سرینگر مانہ 50 فیصد ریکارڈ محفوظ کیو گیو ہے اور باقی ماندہ ریکارڈ ور کم جاری ہے۔ اس تیں علاوہ جموں مانہ کلا کیندر غے نزدیک 7.2 کروڑ روپیاں غی لاگت نال 6 لکھ منتقل کیا گیا ہیں۔

SDRF List

چیف سیکریٹری اٹل ڈلو نے گزشتہ روز ایس ڈی آر ایف غی ایس ای سی میٹنگ غے دوران قدرتی آفات غی بازآبادکاری غا اصولاں غے تحت 5 مزید مقامی آفات نانہ موجودہ فہرست مانہ شامل کیو ہے۔ اس اعلیٰ سطحی میٹنگ غے دوران شامل کی گئی 5 آفات مانہ گلشئیر جھیل غے اندر آٹھن آلا طوفان، چڑک، بجلی پین نال ہون آلا نقصان، پہاڑی برفباری، انساناں ور جانوران غا حملہ تے کشتیاں غا پانی مانہ آٹھ جانو شامل ہیں۔ اس میٹنگ غے دوران موجودہ ایس ڈی آر ایف عملہ نانہ مزید فعال بنان خاطر 6 عشریہ 5 کروڑ روپیاں غی رقم واگذار کرن غو وی اعلان کیو گیو۔ اس رقم نال ڈرونز آگ غے اندر استعمال ہون آلا کپڑا تے کئی طرح غا کٹر وغیرہ خریدیا جائیں گا۔

Poonch

ضلع ترقیاتی کمشنر پونچھ وکاس گنڈل نے گزشتہ روز ضلع غے اندر مشن یوتھ غے تحت چل رہی بکھ بکھ کود روز گار سکیمان غو جائزو لیو۔ اس دوران پی ایم ای جی پی، آر ای جی پی، کے وی آئی بی، کے آئی وی سی، وغیرہ اسکیمان ور تبادلہ خیال کیو گیو۔ ڈی سی موصوف نے بکھ بکھ اسکیمان غے تحت ہو رہا کم کاج غو جائزو لیو اور کہیو کہ بے روز گار نوجوانان نانہ ضلع غے اندر بیداری مہم غے تحت ان اسکیمان نال جوڑن غی ضرورت ہے۔ ان اسکیمان غی موثر عمل آوری مانہ درپیش ہر طرح غی مشکل غا ازالہ غو یقین دواتاں واں ڈی سی موصوف نے کہیو کہ بے روز گار نوجوانان تک ان اسکیمان غو فائدو ہر حال مانہ پُنجو چاہیے۔

World Squash

عالمی سکیوش ٹیم چمپئن شپ 2024 مقابلان مانہ بھارتیہ خواتین ٹیم پری کوارٹر فائنل مقابلہ مانہ اسٹریلیا غی ٹیم نال ہانگ کانگ چین مانہ آمنے سامنے وے گی۔ اس تیں پہلاں بھارتیہ خواتین ٹیم نے اٹلی غی ٹیم نانہ 0/3 تیں شکست

دے غے پری کورٹر فائنل مانہہ جگہ بنائی۔ اسے طرح بھارتیہ مرداں غی ٹیم وی کوارٹر فائنل مانہہ ملیشیا غی ٹیم نال مقابلو کرے گی۔ اور یوہ مقابلو تہاڑی 12 بجے شروع وے گو۔

Weather

جموں خطہ غے اندر سردی غی شدید لہر محسوس کی جا رہی ہے محکمہ موسمیات غے مطابق جموں مانہہ گذشتہ رات غو کہٹوں کہٹ درجہ حرارت 5 عشاریہ 4 ڈگری سلیسس ریکارڈ کیو گیو جد کہ گذشتہ روز غو درجہ حرارت 19 عشاریہ 9 ڈگری درج کیو گیو تھو۔ اس تیں علا وہ محکمہ موسمیات نے 18 دسمبر تک موسم خشک رہن غی وی پیشنگوئی کی ہے۔

اس غے نال ہی خبراں غو یوہ بلیٹن ختم ہوؤ۔

News Read by:-Abaid-Ur-Rehman

News Editor:- Manoj Kumar

DEO:- Alam Khan

Skilled:- Tarsem Lal